

MJ Elimina Artigu 187-B Kona-ba Agravaun hosi Esbosu-Lei Kriminaliza Difamasaun



Diretór Nasionál ba Asuntu Legál, Ministériu Justisa (MJ), Nelinho Vital

DILI, 19 jullu 2020 (TATOLI)—Governu lihosu Ministériu Justisa (MJ) durante ne'e rona públiku sira-nia preokupasaun kona-ba esbosu-Lei Kriminalizasaun Difamasaun consege elimina tiha artigu 187 alínea B número 1, ne'ebé ko'alia kona-ba agravaun partidu polítiku no ba funsionáriu sira.

Diretór Nasionál Ba Asuntu Legál iha Ministériu Justisa, Nelinho Vital esplika, iha Artigu 187 kona-ba agravaun (hatodan) iha alínea B número 1 hateten Ajente ka autór ne'e sei hetan kastigu ho prizaun to'otina rua (2) ka multa, se faktu sira ne'ebé deskreve iha artigu anterior prátika ka hala'o, a) liuhosi meu kai ha sirkunstansia ne'eb'e fasilita hafe informasaun hanesan média komunikaun sosiál ka rede sosiál sira; b) kontra ka hasoru sira ne'ebé halo knaar funsaun públika, relijoizu no polítiku sira.

“Ami kontente loos tanba ami simu paraser lubuk ida hanesan NGO ka sociedade sivil sira no pesóal balu, sira fó pareser mai ami no consege ami elimina tiha kona-ba agravaun ba funsionáriu públiku ba partidu polítiku sira iha artigu 187 alínea B número 1,” dehan Nelinho Vital ba jornalisa sira hafoin partisipa programa Editor Club ba dala haat iha salaun Konsellu Imprensa, Kintál Boot, foin lalais ne'e.

Diretór ne'e hateten, kona-ba artigu 187 agora elimina tiha ona tanba durante ne'e públiku sira hatama hela pareser ba Ministériu Justisa, signifika sira rona no atende hela ba Lei ne'e rasik. Agora diskusaun sei la'o nafatin no rona ideia sira hotu mak muda tiha ona artigu maibé agora atu distingui tan ninia definisaun sira-ne'e, nune'e labele mosu multi interpretasaun.

Kona-ba Lei kriminaliza Difamasaun ne'e, nia dehan, iha pro-kontra ne'e normál tanba Estadu ida-ne'e Diretu Demokrátiku. Maibé, tuir nia, ida-ne'e polítiku ida hosi Governante sira oinsá atu eduka sociedade sira respeitu ba malu atu nune'e ema labele hatun ema-nia onra.

“Ida-ne'e dezisaun ida polítiku hosi governante sira. Depois ita haree mós ba lakuna ne'ebé iha, ita responde mós ba problema ne'ebé agora mosu daudaun. Tanba oinsá ita atu desenvolve sociedade ida atu respeitu ba malu, atu nune'e ema labele hatun ema-nia onra,” nia dehan.

Aleinde ne'e, nia esplika, Lei Kriminaliza Difamasaun ne'e la'os atu regula jornalista sira de'it maibé ba ema hotu-hotu. Tanba ne'e, nia esplika, Ministeriu Justisa elimina ona artigu 187 kona-ba proteje agravaun ba ema funsionáriu públiku ba partidu polítiku sira,” nia dehan.

Nia esplika, Diskusaun Lei Kriminaliza Difamasaun ne'e kontinua la'o nafatin, aleinde ne'e sira mós sei konsentra ba Lei Medida Prevensaun no Kombate Korrupsaun (MPPC) no mós ba tan reforma judisiáriu ne'e la'o nafatin.

Jornalista : Osória Marques

Editór : Cancio Ximenes